

qui ei Felip Biu ?

Tèxte : Danièl Lagüèita

Lo vòste abonament qui ei acabat

« Lo saber que's transmet de persona a persona; quan n'existeish pas sonque dens los libes, que i demora. » Aquesta frasa, lhèu lector amic que't semblarà sonque la conclusion logica de consideracions generaus sus la transmission de las lengas ... E totun, e totun : que la caleré escrìver sus las murrallas tà har préner consciéncia de çò que se'n cau véder tà sauvar la nosta lenga, har-la viver e enriquir. Que poderé tanben estar un subjècte tà ua dissertacion de filosofia...

Qu'ei lo Felip Biu qui a escrivut aqueths mots dens l'article *Lo lengatge shiulat d'Aas : istòria d'ua arrenavida*, un article luminós e beròi documentat. Un article que cau har conéisher pr'amor que tracta d'un subjècte qui apartien au patrimòni mondiau de l'umanitat e açò que's passa a casa ! Be podem llevar lo cap, parlar de l'originalitat e deus tesaus desconuts que chic a chic e'ns tornam acampar. « Un gran mercés, Felip, per aqueth article. B'èra necessari que l'escrivossis, qu'èi atau après causas qui non sabèvi pas. Çò qui avetz hèit dab lo Gerard que comptarà com ua hita de las màgers en l'arrenavida de la nosta cultura... » ce l'a escrivut lo Gilabèrt Nariòo.


Qui ei Felip Biu ? Doctor en culturas e lengas regionaus, professor certificat d'occitan-lenga d'òc e de letras classicas, Felip Biu qu'ensenha l'occitan a l'universitat de Pau. Estrambordat per l'idea d'arrevitar un element deu patrimòni occitan qui pensavan perdut, qu'aprengó a shiular en 2012 dab l'aròlet deu *Siular d'Aas*.

Despuish 2015 que balha cors de lenga shiulada a l'universitat de Pau, au collègi de Laruntz e, taus adultes, a l'Ostau Bearnés de Pau e a Laruntz.

Solide ne son pas los de Per Noste qui van mespresar lo saber deus libes, qu'ei lo noste tribalh ! E qu'em urós de poder estar los pòrtavotz de'us qui s'i hèn tà disèr la nosta cultura n'ei pas un « patés » mes ua branca originau de la cultura umana. « Las ideas que mian lo monde » ce disè Hegel dens *Las leçons sus la filosofia de l'istòria*. Mes

las ideas que las cau har córrer dab mots, « ... aqueths mots arrepicats qui hèn istòria chic a chic » com ac ditz Elisa Harrer en un poèma d'aqueste numèro, ua istòria qui s'esvaneish dab nosatis « com buga sus un carrèu, e los mots, sortits deu capèth deu magician que s'envolan, Diu sap tad on... mes quauqu'un, un beròi dia, lhèu que'n trobarà un... »

La transmission de persona a persona que passa (com ac vedèn ací dab quauques fòtos) per las escòlas. Qu'auram lo parat de'n parlar enqüèra dab lo numèro de genèr/heurèr, pr'amor que i a personas com lo Felip Biu qui s'amanjan tad aquò har. Enqüèra exemples qui'ns muishan que ne cau pas atèner las iniciativas d'un poder politic centrau e jacobin, mes que ns'i cau gahar de tira : deishatz-nse har ! Qu'avem dejà començat...



Amassada Generau de Per Noste :

L'amassada generau de Per Noste que's debanarà lo 17 de març de 2018 au locau de Per Noste a 10 òras deu matin. Los qui volerén estar membres deu conselh d'administracion, que pòden enviar ua letra de candidatura abans lo 3 de març de 2018.